



JUDICIAL SYSTEM MONITORING PROGRAMME

PROGRAMA MONITORIZASAUN BA SISTEMA JUDISIÁRIU

Komunikadu Imprensa

02 Abril 2024

JSMP apresia Tribunál Rekursu reativa filafali Programa Tribunál Movel ho regularmente iha tribunál primeira instánsia sira

Iha inísiu 2024, Tribunál Rekursu reativa filafali Programa Tribunál Movel ho regularmente iha Tribunál Judisiál Primeira Instánsia sira. Ho nune'e, Tribunál Judisiál Primeira Instánsia Suai (TJPIS) no Tribunál Judisiál Primeira Instánsia Baukau (TJPIB) hala'o filafali julgamentu movel depoisde tinan rua paradu. Mezmu iha tinan 2023, Tribunál Judisiál Primeira Instánsia Dili no mós Tribunál Suai kontinua realiza julgamentu movel, maibé la regularmente ka bazeia de'it ba iha inisitiva hosi autór judisiáriu sira.

“Objetivu hosi programa tribunál movel mak atu hakbesik justisa ba povu iha área rurál sira. Programa ida ne'e mós nu'udar aproximasaun di'ak ne'ebé refleto ba iha situasaun atual tribunál primeira instansia sira ne'ebé konsentra de'it iha munisípiu haat iha teritóriu laran. Tanba ne'e, JSMP apresia Tribunál Rekursu ne'ebé iha inísiu tinan 2024 ne'e, reativa filafali julgamentu movel ho regularmente iha jurisdisaun Tribunál Primeira Instánsia sira (eseptu Oekusi) ne'ebé kuaze tinan rua paradu ka la la'o. Lihosi tribunál movel ne'e bele hakbesik liután justisa ba comunidade sira nune'e bele ajuda comunidade sira ne'ebé hela dook ka hela iha área rurál bele asesu ba justisa formál ho baratu no fasil. Alende ne'e liuhosi tribunál movel ne'e bele redús kazu pendente sira iha jurisdisaun tribunál idak-idak,” dehan Sra. Ana Paula Marçal, Diretora Ezekutiva JSMP.

Tribunál movel realiza bazeia ba oráriu iha munisípiu sira ne'ebé laiha tribunál permanente hanesan Munisípiu Ermera, Aileu, Likisá no Atauro (kobre hosi Jurisdisaun Tribunál Judisiál Primeira Instánsia Dili). Munisípiu Manatuto, Vikeke no Lospalos (kobre hosi Jurisdisaun Tribunál Judisiál Primeira Instánsia Baukau) no Munisípiu Bobonaro, Ainaro no Same (kobre hosi Jurisdisaun Tribunál Judisiál Primeira Instánsia Suai). Mézmuke nune'e, bainhira iha razaun ne'ebé justifikadu, bele hala'o mós tribunál movel iha munisípiu ne'ebé tribunál permanente harii ba, hanesan Tribunál Suai hakbesik justisa ba iha comunidade iha Postu Administrativu Zumalai tanba de'it kondisaun testemuña isin-rua todan nune'e labele atu halo viajen ba iha tribunál permanente hodi fó nia depoimentu.

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275

Telefone: 3323883 | 77040735

www.jsmp.tl

info@jsmp.minihub.org

Facebook: www.facebook.com/timorleste.jsmp

Twitter: @JSMPtl


Bazeia ba JSMP nia monitorizasaun iha tribunál movel ne'ebé hala'o iha Munisípiu Bobonaro, Manatuto no Vikeke, iha Janeiru to'o Fevereiru 2024, JSMP konsege monitoriza kazu sira hamutuk 49* no hosi totál kazu hirak ne'e maioria mak kazu Violénsia Bazeia ba Jéneru (VBJ) hamutuk 38 no kazu seluk hamutuk 11. Kazu 25 mak hetan ona desizaun no kazu 24 mak sei iha prosesu nia laran.

Informasaun kompletu bele haree iha tabela no gráfiku kraik.

Tabela :


Tribunál	Krime	Sivil	Totál
Dili	0	0	0
Baukau	35	0	35
Suai	14	0	14
Oekusi	0	0	0
Totál	49	0	49

Gráfiku :



* Totál kazu 49 ne'e la representa totál kazu ne'ebé Tribunál Judisiál Primeira Instáncia sira julga liuhosi tribunál movel durante Janeiru–Fevereiru 2024

Númeru desizaun ba kazu movel



Antes ne'e, Programa Tribunál Movel suporta hosi UNDP hahú hosi tinan 2010 to'o tinan 2018 maibé iha tinan 2019, UNDP deside hapara nia-suporta ba tribunál movel, nune'e programa tribunál movel paradu ho razaun laiha orsamentu. Mézmuke iha jurisdisaun tribunál balun hala'o nafatin julgamentu movel laho regularmente no ba kazu balun de'it.

JSMP espera reativamente tribunál movel iha tinan ida ne'e, nu'udar parte ida hodi kumpri prinsípiu julgamentu ne'ebé justu, baratu no lalais.

Atu hetan informasaun liutan favór kontaktu:

Ana Paula Marçal

Diretora Ezekutiva JSMP

Telefone: 3323883/77040735

Diresaun e-mail: ana@jsmp.tl